

太一救苦天尊

祁至峰 主編

蔣門馬 點校

敬以此經書 獻給
普天下富有愛心的同胞

念誦太一救苦天尊聖號
祝願世人解脫苦厄煩惱
祝汶川大地震遇難同胞
早日出離陰境超生天堂

東極青華大帝

太一救苦天尊



目 錄

太一救苦天尊介紹	1
太一救苦護身妙經	9
太一救苦天尊說拔罪酆都血湖妙經	14
元始天尊濟度血湖真經	16
元始天尊濟度血湖真經卷上	16
元始天尊濟度血湖真經卷中	19
元始天尊濟度血湖真經卷下	22
太上救苦天尊說消愆滅罪經	24
太上洞玄靈寶救苦妙經	26
誦經持號驗	27
太上洞玄靈寶轉神度命經	29
太一救苦天尊靈驗記	37
文銖臺二僧擊救苦天尊像驗	37
張仁表念太一救苦天尊驗	38
李邵畫太一天尊驗	40
李昌遐誦《消災經》驗	41

太一救苦天尊介紹

道教先天諸神，最上有三清天尊：玉清元始天尊，上清靈寶天尊，太清道德天尊；下有昊天六御宸(chén)尊：昊天金闕至尊玉皇大帝，中天紫微北極太皇大帝，勾陳上宮南極天皇大帝，承天效法后土皇地祇，南極長生大帝，東極青華大帝(青玄九陽上帝)太一救苦天尊。太一救苦天尊爲六御之一，爲濟拔幽冥之主。道教鍊度亡魂，皆以太一救苦天尊爲主。

太一救苦天尊，取名太一，到底有何意義？三外老夫鄭所南《太極祭鍊內法議略卷下》(後文引語均出此)云：“諸經諸法諸書，‘太一’二字極多，不暇盡議。惟太一天尊，太一兩字尤爲微妙。太者，至也；一者，不二也。苟悟至不二之理，能守其至不二之天，則精神魂魄悉聚而不散，離種種邊，非空非色，寂然不動，渾然至真，還我本然天真之一。此一者，非一(數)之一也，乃我本然之天也；以其一(原作以一其)眾魂不一之妄心，隨心現化，而曰太一天尊。...總萬於一，不一於一，而還我之天於太極未兆朕之前，無形無名，非同非異，故曰太一。至於是，道亦泯矣，況於數乎？應化之真，不得已而有天尊之名。...太上說《太一救苦護身保命妙經》云：‘東方長樂世界，

有大慈仁者，太一救苦天尊，化身如洹河沙物，物隨聲應其間。老君奏元始曰：此聖威德變化救生，從何而有？甚劫修行？惟願應機，爲眾宣說。天尊曰：此聖，在天呼爲太一福神，在世呼爲大慈仁者，在地獄(呼爲日耀帝君，在外道攝邪呼爲獅子明王，在水府)呼爲洞淵帝君。汝是吾之炁，吾是汝之根，汝知吾知。此是九陽之精，固是元始化身。’然元始、老君亦尊呼之，爲此聖而重其說也。太一位號曰：‘青華長樂界，東極妙嚴宮，七寶芳騫林，九色蓮花座，萬真環拱侍，百億瑞光中，玉清靈寶尊，應化玄元始，浩劫垂慈濟，大千甘露門。應化色身，紫金瑞相，大聖大慈，大悲大願，尋聲赴感，太一救苦天尊’，及‘青玄上帝’四字，並是託境爲喻，皆不得已立此徽美之稱也。”

道教經書中，太一兩字亦有作太乙者，到底以何者爲正？鄭所南說：“諸書未有用乙字者，後人恐一流於數，乃易之以乙。豈知乙之義，與一之義，大不侔，當以太一爲正。”

太一救苦天尊能夠濟度眾生幽冥之苦厄，到底有何理論根據？道教鍊度亡魂，既以太一救苦天尊爲主，爲何又有《元始天尊濟度血湖妙經》這樣的經書？元始天尊與太一救苦天尊到底有何關係？鄭所南直言：“此(太一救苦天尊)是九陽之精，固是元始化身。... 太一天尊卽道

也。... 《道藏》諸鍊度經法，固有主於元始天尊者，然太一天尊，則為濟拔幽冥之主也。元始以一炁肇造化，而生萬物之根；太一導萬物、斂造化，而還一炁之源。元始天尊開其始，太一天尊歸其終，論名雖殊，論理則一。”《太一救苦護身妙經》說：“(元始)天尊曰：‘萬物吾生，萬靈吾化，遭苦遭厄，當須救之。... 汝(太上老君)是吾之氣，吾是汝之根，汝知吾知。此(太一救苦天尊)是九陽之精，甚靈甚靈。汝可祕之，不可盡述。’是時，(太上)老君聞天尊言，閉目定神，彈指叩頭，呪曰：元元之祖氣，妙化九陽精。”

這兩段文字，清楚明白地表述了：萬物(包括眾生)、萬靈(包括鬼神)、太上老君、太一救苦天尊，都是元始天尊“元元之祖氣”所化生。而元始天尊又是道之現化，因此經文中曰“道言”，亦真是以天尊之言為道之言。既化生之后，“緣感立形”，各有示現，似乎不同矣，而其本質實無不同，皆是道所化生，與道同體。一切化生自道，又復還於道，與道合真。元始天尊開其始，太一天尊歸其終，太上老君運其中，代道行化，各有職司。細味元始、太一、太上之名，確實是道之別名，因此鄭所南直言“太一天尊即道也”。《道德經》五十一章中說：“道之尊，德之貴，夫莫之命而常自然”，因此《太一救苦護身妙經》說：“(元始)天尊告(太上)老君曰：此聖(太一救苦天尊)

最尊最貴，最聖最靈。”而盈十方界，無非是道所貫通，亦無非是氣所貫通，亦即是太一救苦天尊所貫通，因此經中說“爾時救苦天尊徧滿十方界”，與萬物萬靈，無異同，無間隔，因此有感即應，此感彼通，捷於影響，因此太一救苦天尊能濟度眾生，“神通無量”，實非無知之迷信，而確有其堅實的理論根據。道教以道而立教，名副其實，不亦宜乎！

眾生之所以有生死苦厄，《元始天尊濟度血湖真經》說：“良由下界眾生，本身自昧，遭苦遭厄”，“只緣貪婪愛慾，迷失本真”，“自作自受，猶響應聲。終劫說之，亦難窮盡。略舉其要：夫人之稟生，同資一氣；及乎誕育，命係三元；壽夭吉凶，富貴貧賤，種種罪福，善惡生死，各逐宿命根元，悉有報應，隨其業力，永不差移。”鄭所南亦說：“人之生也，耳馳於聲，目馳於色，念念之間，以萬事分其天真之一，故眾生死而為長夜之魂。悟萬化，還其天真之一，故太一天尊能救幽魂之苦。……老子曰：‘天得一以清，地得一以寧，神得一以靈。’莊子曰：‘子得一，萬事畢。’幽魂苦爽得一，而(有)不受度更生乎？”

道教鍊度亡魂，皆以太一救苦天尊為主。鄭所南說：“元始以一炁肇造化，而生萬物之根；太一導萬物、斂造化，而還一炁之源。元始天尊開其始，太一天尊歸其終”，太一救苦天尊“為

濟拔幽冥之主也”。《元始天尊濟度血湖真經卷中》說：“一切罪魂，須悟本真，乘光超度，皆得生天。”《太上洞玄靈寶轉神度命經》說：“卽令亡者... 隨願往生，東方淨土，聞經聽法，面對天尊，衣食自然，逍遙快樂，展轉託生，成無上道。”《太一救苦護身妙經》說：“若有眾生，爲七祖九先、門人同學、夫妻男女，身歿之後，流滯寒庭，未得託生，但當存思，念誦聖號，自然出離陰境，便得生天。”

太一救苦天尊居於東方長樂世界，《太一救苦護身妙經》及《元始天尊濟度血湖真經卷中》均說：“此東方長樂世界，有大慈仁者，太一救苦天尊”。太一救苦天尊救度亡魂，使隨願往生東方淨土，這是道教的東方淨土宗。經中常說“爾時救苦天尊徧滿十方界”，鄭所南說：“然則太一天尊，非實居東方也。東方乃天地之生炁，託言東方爲現化之境，以溥(徧)生生之恩焉。”

太一救苦天尊，不但拔度亡魂，《太上洞玄靈寶救苦妙經》說：“救苦天尊，徧滿十方界，常以威神力，救拔諸眾生，得離於迷途。眾生不知覺，如盲見日月。我本太無中，拔領無邊際。慶雲開生門，祥煙塞死戶。初發玄元始，以統祥感機。救一切罪，度一切厄。”受苦受難的眾生，只要念誦太一救苦天尊之名，太一救苦天尊卽“尋聲救苦”，使免於厄難。《太一救苦護身妙

經》及《元始天尊濟度血湖真經卷中》說：“天尊告老君曰：汝可舉聲唱太一之名，使仙官齊詠，自然應化現身。”《道教靈驗記·張仁表念太一救苦天尊驗》記載：“(張仁表)即高聲念太一救苦天尊十餘聲。牽頓者皆笑曰：臨渴穿井，事同噬臍，胡可得也？既聞眾笑，不阻其念，更唱十餘聲，其調哀楚，其音悲切，亦淚下沾衣。如是忽有赤光，照其左右，牽頓者一時捨去，獨在光明之中。顧盼四方，山川明媚，雲物閒暇。頃之，天尊與侍從千餘人，現其前矣。”《太上洞玄靈寶轉神度命經》說：“首過請福，自下之高。謝罪求恩，由心入道。...神運感通，自獲靈應。”

《太一救苦護身妙經》說：“若有眾生，時遭疾疫，病痛纏綿，可以焚香，念誦聖號，看轉此經，疾患退散，克獲安寧。若有眾生，求官覓職，姦佞妄生，但當念誦聖號，看轉此經，自然嫉妬不生，高遷祿秩。若有眾生，泛涉江海，波浪所驚，魚龍欲傷，可以存思，念誦聖號，便得達岸，無有害傷。若有眾生，值雷霹靂，風雨驚怖，但當存思，念誦聖號，神氣爽清，魂魄不動。若有眾生，父母師資，六親不和，兄弟乖疏，但當存思，念誦聖號，看轉此經，自感六親和睦，父慈子孝，兄友弟恭。若有帝王國主，朝生叛臣，兵火作亂，風雨不調，萬民塗炭，怨地尤天，但當持齋念誦，看轉此經，風雨便得順時，叛臣敗露，國泰民安。若有眾生，

爲邪精鬼賊，妄來所傷，但當存思，念誦聖號，妖魅自止，鬼賊滅亡。若有眾生，山林往來，被蟲蛇禽獸奔奪所傷，但當存思，念誦聖號，禽蟲自退，不敢來害。若有女人，懷受胎孕，臨產艱難，但當存思，念誦聖號，自感真氣祐護，無痛無傷，便生智慧之男，有相之女，六根具足，母子團圓。若有男子女子，慕道求仙，在家出家，養性養命，但當存思，念誦聖號，看轉此經，便得功行圓滿，白日昇天。若有眾生，頻遭枷鎖，牢獄之中，呻吟難訴，但當存思，念誦聖號，便得解脫，出離囹圄。若有眾生，爲七祖九先、門人同學、夫妻男女，身歿之後，流滯寒庭，未得託生，但當存思，念誦聖號，自然出離陰境，便得生天。若有眾生，爲冤家牽引，復連相纏，但當存思，念誦聖號，冤家解釋，復連斷除。”

既然要“存思”，如《元始天尊濟度血湖真經卷中》說：“於是諸仙真人齊聲稱詠太一救苦天尊之名，想見天尊乘五色祥雲九頭獅子”，就當瞭知天尊的“應化色身，紫金瑞相”到底是何模樣？《道教靈驗記·張仁表念太一救苦天尊驗》中記述有太一救苦天尊親身示現的形像：“天尊坐五色蓮花之座，垂足二小蓮花中，其下有五色獅子九頭，共捧其座，口吐火焰，繞天尊之身。於火焰中，別有九色神光，周身及頂，光焰鋒鋸外射，如千萬鎗劍之形。覆七寶之蓋，後有

騫木寶花，照曜八極。真人力士、金剛神王、玉女玉童，充塞侍衛。陰陽太一四十六神，自領隊從，亦侍左右。雲車羽蓋，徧滿空中。...以吾此像，廣示於人。”但據各經記載，後人對天尊座下的獅子，似有不同理解。《元始天尊濟度血湖真經卷中》說“想見天尊乘五色祥雲九頭獅子”、“乘九頭獅子金蓮翠葉之座”，則天尊乘坐的似乎是一頭長有九個頭的獅子。《太一救苦護身妙經》說“九頭獅子左右從隨”，則獅子不只一頭(量詞)，否則就無法“左右從隨”了。《道教靈驗記》說“其下有五色獅子九頭，共捧其座”，則明白說，獅子共是九頭(量詞)，一齊“共捧其座”。太一救苦天尊為“九陽之精”，則不論是一頭(量詞)九個頭的獅子，還是九頭(量詞)一個頭的獅子，其核心都是數字一(太一)和九(九陽)，都是太一救苦天尊形像的一種示現。

“人生幾何，易生易滅。如彼石火，不得長久。如彼浮漚，豈能堅固？生老病死，日夜相侵。變滅不常，須臾散壞。宜爾忘乎目，則光溢無極；泯乎耳，則心識常淵；兩機俱忘，淳淳全全，合乎大方；溟溟淙淙，合乎無倫。我之所維，與天地共為長久。”(《元始天尊濟度血湖真經卷下》)

祁至峰 蔣門馬 2009年5月12日

nirvanajmm104722@163.com

太一救苦護身妙經

爾時，元始天尊在玄景之上，清微天中，九色玉堂，陞七寶座，放大光明，普集萬靈，與天教化。十方天尊、道君、老君、帝君、元君、丈人、聖人，萬萬仙眾，俱來詣座，聽宣妙法。於是梵王稱善，帝釋欣歌，仙樂自響，隨光而至。

是時，太上老君身離玉座，步躡蓮花，真人侍於左右，玉女扶於曳裾，至天尊前，奏曰：臣等蒙師開化，受福天堂，施功無極，恩不可量。臣觀三界之中、苦海之內，無量眾生，橫遭厄難，罪網牽纏，異類羣情，難逃生化。臣不可住於太清，欲仗威光，分身三界，救度羣情。惟望至尊，觀心慈愍。

於是，元始天尊微起法身，告老君曰：善哉！善哉！汝離玉座，驚怖萬天，救苦救生，不須汝言。可還座中，吾爲宣說。

天尊曰：萬物吾生，萬靈吾化，遭苦遭厄，當須救之，不須汝威力化身救度。此東方長樂世界，有大慈仁者，太一救苦天尊，化身如恒(河)沙數，物隨聲應。或住天宮，或降人間，或居地獄，或攝羣邪，或爲仙童玉女，或爲帝君聖人，或爲天尊真人，或爲金剛神王，或爲魔王力士，或爲天師道士，或爲皇人老君，或爲天醫功曹，或爲男子

女子，或爲文武官宰，或爲都大元帥，或爲教師禪師，或爲風師雨師。神通無量，功行無窮。尋聲救苦，應物隨機。今告汝知。

老君重奏曰：此之威神，有無量變化，如何得至我師御前？

天尊告老君曰：汝可舉聲唱太一之名，使仙官齊詠，自然應化現身。

於是老君眾仙等，遵其教旨，齊聲稱詠太一救苦天尊之名。忽見帝君班中有童子一人，步步躡於蓮花，稽首至天尊前，奏曰：臣乃太一，爲我師開化說法，臣集相聚形，聽宣妙音。天中快樂一時，地下動經萬劫。三界之中，羣生受苦，高聲叫喚，苦哉！苦哉！旋遶天尊，禮拜俯伏，乞下天闕(原作關)。

於是，眾仙見童子奏對，泣淚滴衣，哽噎嘆言：天上快樂，地下受災。輪迴報對，何時清閒？

天尊告太一曰：汝行願慈悲！眾生受苦，依汝行願，分身救之。童子喜笑，再拜而退。

眾仙觀見童子化一天尊，足躡蓮花，圓光照耀，手執柳枝淨水，九頭獅子左右從隨，乘空而去。又見天尊化一帝君，足躡蓮花，手執如意，圓光照耀，九頭獅子左右從隨，乘空而去。又見帝君化一真人，足躡蓮花，手放神光，上通九天，下通九地，九頭獅子左右從隨，乘空而去。又見真人化一女子，身著火錦襯衣，披髮跣足，躡於蓮

花，手執金劍，圓光照耀，九頭獅子，口吐火焰，遶於身形，乘空而去。

老君奏天尊曰：此聖威德，變化救生，從何而有，甚劫修行？惟願應機，爲眾宣說。

天尊曰：此聖，在天呼爲太一福神，在世呼爲大慈仁者，在地獄呼爲日耀帝君，在外道攝邪呼爲獅子明王，在水府呼爲洞淵帝君。汝是吾之氣，吾是汝之根，汝知吾知。此是九陽之精，甚靈甚靈。汝可祕之，不可盡述。

是時，老君聞天尊言，閉目定神，彈指叩頭，呪曰：

元元之祖氣，妙化九陽精。

威德布十方，恍恍現其真。

三九揚風出，徘徊離始青。

恭敬生瓊液，奉之免渴飢。

萬靈當信禮，八苦不能隨。

積行持科戒，提攜證玉京。

爾時，天尊重告老君及諸仙曰：

若有眾生，時遭疾疫，病痛纏綿，可以焚香，念誦聖號，看轉此經，疾患退散，克獲安寧。

若有眾生，求官覓職，姦佞妄生，但當念誦聖號，看轉此經，自然嫉妬不生，高遷祿秩。

若有眾生，泛涉江海，波浪所驚，魚龍欲傷，可以存思，念誦聖號，便得達岸，無有害傷。

若有眾生，值雷霹靂，風雨驚怖，但當存思，

念誦聖號，神氣爽清，魂魄不動。

若有眾生，父母師資，六親不和，兄弟乖疏，但當存思，念誦聖號，看轉此經，自感六親和睦，父慈子孝，兄友弟恭。

若有帝王國主，朝生叛臣，兵火作亂，風雨不調，萬民塗炭，怨地尤天，但當持齋念誦，看轉此經，風雨便得順時，叛臣敗露，國泰民安。

若有眾生，爲邪精鬼賊，妄來所傷，但當存思，念誦聖號，妖魅自止，鬼賊滅亡。

若有眾生，山林往來，被蟲蛇禽獸奔奪所傷，但當存思，念誦聖號，禽蟲自退，不敢來害。

若有女人，懷受胎孕，臨產艱難，但當存思，念誦聖號，自感真氣祐護，無痛無傷，便生智慧之男，有相之女，六根具足，母子團圓。

若有男子女子，慕道求仙，在家出家，養性養命，但當存思，念誦聖號，看轉此經，便得功行圓滿，白日昇天。

若有眾生，頻遭枷鎖，牢獄之中，呻吟難訴，但當存思，念誦聖號，便得解脫，出離囹圄。

若有眾生，爲七祖九先、門人同學、夫妻男女，身歿之後，流滯寒庭，未得託生，但當存思，念誦聖號，自然出離陰境，便得生天。

若有眾生，爲冤家牽引，復連相纏，但當存思，念誦聖號，冤家解釋，復連斷除。

於是，天尊告老君曰：此聖最尊最貴，最聖

最靈，每月三、九日，多降人間。常於淨室中，焚香禮拜，柳枝淨水，時花藥苗，如法供養，自然壽滿一百二十，五福常臻，八難遠離。切忌竈下灰燼，石榴穢物，此爲不潔，勿令觸之。

爾時，天尊說經畢竟，大會之中，羣仙唱善，獅子能語，鳳凰能言，魚龍成人，枯朽還生，蠢動含情，福資皆徧，巍巍堂堂，皆得昇仙。

於是，道君、老君、無量眾真，同聲讚歎：今聞妙音，大獲利益。奉辭而退。

《正統道藏·洞玄部·本文類·字下》

音義：

曳裾(yèjū)，拖著的衣襟。裾，衣服的前後部分。

慙(mǐn)，慙，哀憐。

跣(xiǎn)足，赤腳，光著腳。

嫉妬(jídù)，忌妒，害賢爲嫉，害色爲妒。

囹圄(língyǔ)，監獄。

太一救苦天尊說拔罪酆都血湖妙經

爾時，救苦天尊，徧滿十方界，會集十方天尊仙眾，說諸因緣。時有妙行真人，出班奏曰：臣今下觀慾界，酆都羅山，血湖二十四獄，岱嶽鋒刀，十八地獄，大鐵圍山，有間無間地獄，三河四海，九江泉曲地獄，猛津洪波，流沙地獄，或則鎔銅灌口，或則利鋸解形，抱銅柱以皮焦，臥鐵牀而肌爛，徧體刀割，百節火燃，鐵杖銅鎚，縱橫拷掠。如斯苦痛，無有休息。

爾時，妙行真人，十方仙眾告天尊曰：善哉！善哉！皆緣前生今世，故作誤爲，悖逆敗常，負命欠財，墮胎損子，血汙產亡，夭橫殞滅，冤仇不解，罪積丘山，沈於地獄之中，血湖血井，血池血山，受諸苦痛，萬劫難逃。今幸天尊，發大慈悲，開大法門，普集一切神仙，宣演妙法，普救羣生，赦一切罪，度一切厄，出離地獄，永辭長夜，覩見光明，萬罪蕩除，冤仇和釋，鑊湯火翳，化作蓮池，劍樹刀山，翻成花圃，赦種種之罪愆，從茲解脫，有冥冥之楚痛，俱獲超昇。而作偈(通行作頌)曰：

天尊大慈悲，普度諸幽魂。(通行作普濟諸幽冥)

十方宣微妙，符命赦泉扃。(赦通行作勅)

拯拔三塗苦，出離血湖庭。

沈魂滯魄眾，男女總超昇。

爾時飛天神王，及諸天仙眾，信受奉行，稽首天尊，奉辭而退。(底本無，據通行本補)

音義：酆(fēng)。勅(chì)，敕，告誡，自上告下。泉扃(jiōng)，墓門，亦指陰曹地府。赦(shè)，寬免罪過。罪愆(qiān)，罪過。宥(yòu)，赦免。硖(xiá)，峽。

按：此經頗為流行，不知原始出處。此據民國鈔本點校，與通行本略有不同。太一原作太乙。此篇經文，總覺文氣不順，疑此經在傳鈔中多有節略以致如此。元始天尊所說已被簡化為“說諸因緣”四字，其餘則為妙行真人及十方仙眾所說。備考。

元始天尊濟度血湖真經

元始天尊濟度血湖真經卷上

爾時，元始天尊在九清妙境，三元寶宮，御劫仞臺中，騫木林下，陞七寶妙座，與太上道君、太上老君、諸君丈人、諸天帝君、十方無極飛天神王、三界五帝大魔王、三界羣仙，一時同至，皆駕八景鸞輿，五色瓊輦，麟馭羽騎，鳳葆龍旂，遊空飛步，吟詠洞章，朝贊天尊，總校圖錄，拔度生死。時有諸天帝君、王妃、玉女、妙香天女等眾，嚴整衣冠，從容雅步，燒香散華作禮，端拱侍立，歌詠仙章。是時，元始天尊、玉皇尊帝，放無量九色祥光，徧照遐邇，於諸光中化現百千萬億三清上帝、玉皇天帝，俱坐九龍百寶千葉瑞蓮妙座；復於光中化現無量百千萬億妙行真人，列班上侍至尊；復以祥光下照十方無極世界，上至圓羅，下及風泉，鐵圍內外，瑩然朗徹，俱同九色瑠璃水晶之光，三界一視，俱在目前。

是時，慈悲救苦諸大真人，乘斯祥光，上詣天闕，燒香散華，端簡長跪，上白天尊言：賤臣忝列仙真，職惟濟度，忽見東北方乃有鬱勃黑毒之氣，上衝天宮，盤結不散。其氣腥惡臭穢，大眾驚異。惟願天尊示以未聞，得悟罪根因緣所起；施

大法藥，醫救沈淪；震大法音，開迪愚昧；注大法雨，灌沐身心；布大法雲，覆蔭羣品；然大法炬，照燭幽昏；開大法門，級引萬類。如蒙慈愍，仰荷玄恩。

是時，天尊撫几高抗，空碧煉真，凝神遐想，哀愍眾生，廣啓慈悲法門，敕命東極長樂世界大慈仁者，太一尋聲救苦天尊，開三元祕藏丹簡瓊樓，出示大行梵炁三元金書，救度真文，遷拔之格，告命青玄救生拔死靈官、符吏，億萬萬眾，下往幽途，尋聲救拔，受度魂儀，上生天堂。

是時，天尊又曰：三洞眾經，萬天寶梵結空爲篆，聚炁成文，彌綸空洞之中，羅絡虛玄之表，具有成典，互越古今。夫萬物吾生，萬靈吾化。良由下界眾生，本身自昧，遭苦遭厄。吾須救之，重爲眾生，顯說因緣。從劫捨身受身，受身不忠不孝，不仁不義，不慈不敬，不讓不謙，傲忽正真，輕慢大道，訾毀經典，誹謗善良，害物傷生，貪婪無厭，七情六慾，三業十纏，營造罪根，結諸惡業，自作自受，猶響應聲。終劫說之，亦難窮盡。略舉其要：夫人之稟生，同資一氣；及乎誕育，命係三元；壽夭吉凶，富貴貧賤，種種罪福，善惡生死，各逐宿命根元，悉有報應，隨其業力，永不差移。凡有下界眾生男子女人，在世之時，或遭王法，橫惡所加，兵刑刎戮，牢獄枷鎖，癰疽癰毒，膿血淋漓，人所棄擲，求生不得，求死不得，憂惱

自煎，無由解脫，罪業愈重，復墮血湖，永無出期，以爲果報，皆由眾生，妄想貪著，不識正真，執繫是非，積諸罪業，任心運意，何莫非愆，不覩慈光，無由曉悟。況人之降衷，稟五行之秀，爲萬物之靈，得生男子，驚天駭地，貴亦難勝，只緣貪婪愛慾，迷失本真，一念既差，降生女質，五濁形漏，匹配夫妻，陰陽結聚，以爲胎孕，冤家債主，互相償報。是故生產有諸厄難，或月水流行，洗浣汙衣，或育男女，血汙地神，汙水傾注溪河池井。世人不知不覺，汲水飲食，供獻神明，冒觸三光；或誤服毒藥，損子墮胎；或男女數多，故行溺死——冤仇報對，魔鬼相攻：或致子死腹中，母亡產後；或母子俱亡，至傷性命；或遭刑戮，兵解難逃；或疾染惡鬼，橫傷非命，死入豐都血湖地獄，備受諸苦，由積血以成湖，認幻緣而有獄。汝以弘願；欲救斯苦，吾爲演說真一不二法門，濟度厄難。

三洞大法諸天救拔梵炁隱語：

觀覺鬱縊，太明紫靈。九神度魂，開闢玉真。
阿奕煒煒，飛天流音。輪景帝常，都靈頤臻。
豁落大有，慶雲啓靈。七耀輝魔，恬愜敷榮。
虛無上首，天紀彌宸。四吁育象，濯曜騰精。
煥赫洞陽，浮景玉堂。七靈謠歌，世元紫堂。
羅英散景，耀明玉房。八景總獸，韶炁攝精。
九都騫鬱，飛生上靈。宿羅靜境，馥育空輪。

灌沃黃華，霏運玄明。神宜開廓，延宛昇庭。
大猷浮景，真定化元。蜺宛素眇，玉梁澄煙。
蕭峙結隅，景羅七纏。秀盤玉府，流輝九玄。
寂然虛邈，飛華拂輶。晨濫錄籍，太漠由延。
阿丘九度，六龍僂輶。翳靄浮羅，紫精馥淵。
溟滓太育，九機化乾。覆形厚德，元河淪精。
育英明陀，景晨眇雲。大仞總監，秀樂禁天。
紫虛陀立，劫量交前。碧霞損梵，眇眇遊元。
六變運量，馘絕惡愆。恢冠玄漠，萬度成仙。
是時諸天大聖、妙行真人、三界十方無鞅真
宰，雲集元始座下，聞聽法音，開悟正性，各各作
禮，信受奉行。

音義：旂(qí)，旗。忝(tiǎn)，有愧於，謙詞。鑑(lán)。愜(kuài)，快。霏(hóng)，幽深貌。馘(guó)，割斷，消滅。鞅(yāng)。

元始天尊濟度血湖真經卷中

爾時，元始天尊懸坐空浮五色獅子之座，玉童玉女，萬億天真，羅列侍衛，而告妙行諸仙真人曰：東北方壬癸之地，有大荒溟渤，海水腥穢，無邊莫測，中有大山，上參碧落，下入風泉，名曰北陰豐都羅山。周迴萬里，是陰氣之主，九地樞機焉。分列諸獄，考罰世人罪惡，及飛禽走獸、胎卵濕化、鱗甲羽毛、動植飛潛，咸皆隸焉。中有一獄，在北陰大海之底，名曰血湖硤石，大小鐵圍，無間溟泠地獄。又分四子獄，曰血池、血盆、血山、血海。四獄相通，有神主之，號曰血湖大神，

在於無極水底，水流其上，臭氣衝天。凡世間產死血屍女人，皆是宿世母子仇讎，冤家纏害，乃至今生一一還報，寂寂於冥夜之中，號號於黑暗之下，渾身血汗，臭穢觸天，金槌鐵杖，亂考無數，飢飡猛火，渴飲血池，萬死萬生，不捨晝夜，常居黑暗，不覩光明，雖遇符簡善功，罪過小減，不能出離，雖得出離，化生異類。非(原作子須)有神力，不能救拔。

此東方長樂世界，有大慈仁者，太一救苦天尊，昔在劫初，發弘誓願，化身如恒河沙數，物隨聲應，在天呼爲太一福神，在世呼爲大慈仁者，在地獄呼爲日耀帝君，在外道攝邪呼爲獅子明王，在水府呼爲洞淵帝君。汝是吾之炁，吾是汝之根，汝知吾知。此是九陽之精，甚靈甚靈。或居天宮，或降人間，或居地獄，或攝羣邪，或爲仙童玉女，或爲帝君聖人，或爲天尊道士，或爲皇人老君，或爲天醫功曹。神通無量，功行無窮。尋聲救苦，應物隨機。汝等可舉聲唱太一之名，使仙官齊詠，自然應化現身。

於是諸仙真人齊聲稱詠太一救苦天尊之名，想見天尊乘五色祥雲九頭獅子，放百寶瑞光，浮空而至元始會下，稽首作禮，遵稟受戒。

於是元始天尊曰：吾觀慾界眾生女人，造種種罪業，身墮血湖，受苦沈淪，動經億劫，永無出期。吾今開琅函寶藏，出金籙赦文，卿可齋往下

方，宣告三界十方、三官九署、十二河源、九幽血湖地獄，赦拔罪魂，得辭長夜，覩見光明。

於是太一救苦天尊，大慈大悲，普濟普度。時有慈悲救苦真人、大慈大惠真人、太一八十一神、天丁力士、青玄功曹、黃籙童子、玉女神王，擁從法駕。天尊放百億瑞光，左手擎瑠璃寶瓶，右手執空青羽枝，乘九頭獅子金蓮翠葉之座，乘空而去，敕詔九鳳破穢大神、洗院大神、無義斷恩大神、正精火目大神、震雷鼓目大神、全形復體大神、解冤釋對大神，清蕩血湖，破除厭穢，告下元始符命，元皇曲赦，救度產死罪魂，時刻昇遷。是時酆都北帝，及諸鬼官、牛頭獄卒、威斂神王、三界大魔、九億鬼王、血湖大神，咸遵勅命，赦拔罪魂，九幽黑簿，一時焚燼，血湖清蕩，化爲寶池，金槌鐵杖，變成蓮華，飲血食穢，化爲甘露。一切罪魂，須悟本真，乘光超度，皆得生天；地獄冥官，皆發善念，同乘惠力，證道成真。而獻頌曰：

稽首虛無無上道，慈悲救苦大慈尊。
神光百億照中昏，徧覆慈雲濡法雨。
硤石溟泠無間獄，血湖血海血池盆。
玉籙大赦諸罪魂，解脫沈淪萬劫苦。
鍊形度命朱陵府，悟道登真眾妙門。
巍巍功德難思議，永爲眾生作慈父。
是時慈悲救苦諸大真人，依稟聖言，宣通命

令，開明長夜，救拔幽途，凡沐慈恩，同超極樂。

音義：齋(jī), 攜帶。

元始天尊濟度血湖真經卷下

爾時，元始天尊告諸大聖、妙行真人曰：下界眾生，五濁色身，不識因緣罪福，貪著淫慾，或爲女身，生育男女，橫遭厄難，或生異疾，夭喪天年，展轉輪迴，不自知覺。告諸眾生，能發善心，恭敬三寶，不殺不害，不嫉不妬，不淫不盜，不貪不慾，不憎不妬，奉戒冥心。能持是經功德，卽有十天善神、護法神王、九天衛房聖母、監生大神、與無量天真大聖，俱來衛護。

天尊言：道生一，一生二，二生三，三生萬物，負陰抱陽，恍恍惚惚，其中有物。其中有物，其名不去，萬物歸之，終不爲大，視之不足見，聽之不足聞，用之不足既矣。

眾等聞說是經，各各會道觀心，怡神默悟。是時，太一救苦天尊、諸天上帝、慈悲救苦諸大真人，承元始之威光，頒宣三元符命，普告北陰世界，九幽長夜，無間溟泠，硤石血湖，諸大地獄之中，救領眾生，咸得超度。

天尊復告眾真曰：吾今演說，卽是《靈寶昇玄濟度血湖真經》，昔祕紫微上宮，三天奧藏，盟真有禁，四萬劫一傳。今當劫運告終，大法宜行，斯可下傳人間，流通轉誦。其有男女，若能如法

修行，利益人天，獲福無量。

於是重宣三元祕梵天寶靈書：

一炁成真，二儀運虛。五靈續絕，七曜扶衰。
旋綱躡空，飛步雲宮。胚胎有始，億劫無終。
金城孕質，玉洞凝神。真氣內養，以成真人。
上入太虛，下通幽泉。雲宮寶室，中有真魂。
出入福鄉，周旋生門。咀嚼靈芝，灌漱金泉。
甘露川流，懸澍丹田。紫霞朝映，三炁凝煙。
瓊室化仙，安座金蓮。真儀掩日，塵劫爲年。

爾時，天尊重告諸仙真人曰：人生幾何，易生易滅。如彼石火，不得長久。如彼浮漚，豈能堅固？生老病死，日夜相侵。變滅不常，須臾散壞。宜爾忘乎目，則光溢無極；泯乎耳，則心識常淵；兩機俱忘，淳淳全全，合乎大方；溟溟泮泮，合乎無倫。我之所維，與天地共爲長久。

於是諸仙眾等聞天尊演說度人津梁，功德不可思議，各各稽首禮謝，信受奉行。

音義：澍(shù)，雨水滋潤。姘(jí)，嫉。泮(xìng)。

《正統道藏·洞真部·本文類·宿下》

太上救苦天尊說消愆滅罪經

爾時，救苦天尊，設大慈悲，爲諸眾生，滅除一切罪業，救拔沈淪，卽令修齋布施，廣建功德，大起福田，召請天龍地祇，四梵天王，阿修羅王，諸天帝主，閻羅天子，泰山府君，司命司錄，五道大神，獄中典者，各恭敬禮拜，稽首叩顙，上白天尊曰：緣以世間眾生，受諸果報，並是大魔王管攝罪簿。若有閻浮國土，十惡五逆，不敬父母，破齋犯戒，烹宰猪羊牛馬六畜，飛禽走獸之屬，種種之罪，一切罪人，身歿之後，皆入九幽地獄，日夜受苦，無由解脫。若以廣修功德，設齋布施，積劫拷掠，繫閉牢獄，無獲生天。

爾時，天尊曰：汝等眾生，諦聽吾言。或有世間男子女人，父母眷屬歿亡之後，宜建道場，修齋行道，散施資財，修功幽府。

一七秦廣大王太素妙廣真君，
二七初江大王陰德定休真君，
三七宋帝大王洞明普靜真君，
四七五官大王玄德五靈真君，
五七閻羅大王最勝耀靈真君，
六七變成大王寶肅昭成真君，
七七泰山府君玄德妙生真君，
百日平等大王無上正度真君，

小祥都市大王飛魔演慶真君，
大祥轉輪大王五化威靈真君。

爾時，天尊曰：汝等眾生人民，死亡之後，沈淪地獄，因斯善會，皆得超生，自然地獄虛閒，滅除罪業、苦惱辛酸。天尊乃詔命左司陽官、右司陰官，較量功德，勒酆都二十四獄考官典吏，放出受苦一切孤魂滯魄，咸令登火鍊之池，各執化形丹界靈符，盡獲更生之因，俱歸道岸。

天尊言：汝等眾生，受苦罪人，得斯拔度，皆獲超生。汝等眾生，各各諦聽，吾當爲汝說偈，誦曰：

酆都夜壑，忽以光輝。
照出幽魂，來飴香糜。
靈符火鍊，百骸自飛。
得見法會，仙岐知歸。
又誦曰：

萬劫難遇，功緣可崇。
開闢幽趣，全假真風。
梯航彼岸，濟惠無窮。
念念生因，駕景飛空。

是時，眾等聞說偈言，咸皆解脫，各各稽首，奉辭而退。

音義：祇(qí)，地神。

《正統道藏·洞玄部·本文類·服下》

太上洞玄靈寶救苦妙經

爾時，救苦天尊，徧滿十方界，常以威神力，救拔諸眾生，得離於迷途。眾生不知覺，如盲見日月。我本太無中，拔領無邊際。慶雲開生門，祥煙塞死戶。初發玄元始，以統祥感機。救一切罪，度一切厄。渺渺超仙源，蕩蕩自然清。皆承大道力，以伏諸魔精。空中何灼灼，名曰泥丸仙。紫雲覆黃老，是名三寶君。還將上天氣，以制九天魂。救苦諸妙神，善見救苦時，天上混無分。天氣歸一身，皆成自然人。自然有別體，本在空洞中。空洞跡非跡，徧體皆虛空。第一委氣立，第二順氣生，第三成萬法，第四主光明。天上三十六，地下三十六，太玄無邊際，妙哉大洞經。歸命太上尊，能消一切罪。

東方玉寶皇上天尊，
南方玄真萬福天尊，
西方太妙至極天尊，
北方玄上玉宸天尊，
東北方度仙上聖天尊，
東南方好生度命天尊，
西南方太靈虛皇天尊，
西北方無量太華天尊，
上方玉虛明皇天尊，

下方眞皇洞神天尊。

道言：

十方諸天尊，其數如沙塵。

化形十方界，普濟度天人。

委氣聚功德，同聲救罪魂。

罪魂實可哀，我今說妙經。

念誦無休息，歸身不暫停。

天堂享大福，地獄無苦聲。

火翳成清署，劍樹化爲騫。

上登朱陵府，下入開光門。

超度三界難，徑上元始天。

於是飛天神王、無鞅數眾，瞻仰尊顏，而作頌曰：

天尊說經教，引接於浮生。

勤修學無爲，悟眞道自成。

不迷亦不荒，無我亦無名。

朗詠罪福句，萬徧心垢清。

爾時，飛天神王及諸仙眾，說是頌畢，稽首天尊，奉辭而退。

(此經有通神庵洞陽子《太上洞玄靈寶天尊說救苦妙經註解》，見《正統道藏·洞玄部·玉訣類·推中》)

誦經持號驗

宣和(宋徽宗趙佶年號)甲辰(1124)秋，池州城下景德禪院，有僧童莫道祖，偶緣母親傾逝，追慕不已，日誦本教經薦擢，用酬罔極之恩。至秋末，有

太平州田功曹，宣教到院安下。每見功曹常以天樞法，救人疾苦，能追攝死魂，以詰昇沈。道祖見其靈異，遂具狀申陳，乞行拯拔。其官人受狀判押，燒令神將去，即時追攝道祖母氏到壇前，問曰：你兒道祖，日夕誦經追擢，尙羈冥司，如何？母對曰：雖得吾兒道祖念經報薦，其誠志未孚。若作六六功德，幽冥普獲霑恩，妾卽得超生。是時若男若女，數百餘人，咸罹痛苦。功曹復問曰：何謂六六？答云：黃籙水陸。道祖泣告曰：自幼捨慈親，依棲梵刹，身計未成，何緣有力，爲大功果？母曰：不然。但志心轉誦道教《太上救苦經》，及持念太一救苦天尊御號，冥司簡奏上天，功卽應聲至矣。又曰：冥司限促，不敢久留。乃作禮謝而去。道祖卽告功曹，求受《太上救苦經》及天尊號，日夜虔誠，兼而誦之，各積千徧，具疏焚化。是夜，母親見夢於道祖曰：汝今不負鞠育之恩，誦經持號，誠格高真，蒙上帝符命，我已得生天矣。自後無復見汝，汝宜自勉力，勿忘正教。言訖，乘雲冉冉而去。

忠翊郎添差池州監押趙子休述。

《正統道藏·洞玄部·本文類·服上》

音義：薦擢(zhuó)：推薦提拔。罔(wǎng)極：《詩經·小雅·蓼莪》：“父兮生我，母兮鞠我……欲報之德，昊天罔極。”朱熹注：“言父母之恩，如天無窮，不知所以爲報也。”後因以“罔極”指父母恩德無窮。罹(lí)，遭受。鞠(jū)。

太上洞玄靈寶轉神度命經

太上道君告南極度命真人曰：夫人臨命(原作欲)終時，及其生氣，安置經像，請諸道士，懺悔受戒，施散財物。衣服臥具，玩弄器用，車輿駝馬，田宅苑囿，侍從僮僕，茵褥帳幔，几杖盤盂，屨履環珮，冠幘帶綬，劍舄璋玦，珠玉金銀，紋繒綺縠，繡畫彩績，氎席牀榻，隨有捨施。造像寫經，入諸功德，旛花幢蓋，香爐鍾磬，及以道士，山居貧病，行道禮拜，講讀設齋，燒香誦念，散花然燈，放生贖命，立觀度人，開赦囚徒，免諸僕賤，放令入道，供養天尊，利益存亡，難思功德。若消災却禍，拯濟病人，福力最深，實爲第一。

太上道君曰：今日男女，受命應終，普告十方，證明懺悔。上從無始，逮至此身，三業六根，造罪無數。會中時有眾等，須爲虔誠，使一切宿愆，並得消滅。既消滅已，便爲說戒。

第一戒者，不得殺害。當來託生，受長壽之身。持心勿犯。

第二戒者，不得邪淫。當來託生，受清淨之身。持心勿犯。

第三戒者，不得偷盜。當來託生，受富貴之身。持心勿犯。

第四戒者，不得欺誑。當來託生，受敬信之

身。持心勿犯。

第五戒者，不得飲酒。當來託生，受智慧之身。持心勿犯。

太上道君曰：今日男女，受戒畢已，持是戒根，轉神入妙，生清淨國，坐大蓮花，觀聽法音，永無退墮，證成真道。

太上道君曰：爲諸男女，若存若亡，禮拜十方，歸心懺悔。

眾等志心歸命：東方救苦無上慈尊、東方無極世界得道天尊、仙真聖品、無鞅數眾，一切敬禮，徧悉歸依，證明懺悔，卽令亡者，無始以來，受身生身，從劫至劫，三業六根，構造諸罪，殺生偷盜，邪淫放蕩，貪愛恠惜，嗔怒罵詈，愚癡顛倒，綺言妄語，惡口兩舌，飲酒食肉，破齋犯戒，輕師叛道，訾毀經文，穢汙玄壇，損壞尊像，逆天違地，祝鬼詛神，裸露星辰，吹噓風雨，五逆不孝，萬罪千愆，無量無邊，悉爲除滅。隨願往生，東方淨土，聞經聽法，面對天尊，衣食自然，逍遙快樂，展轉託生，成無上道。稽首歸依，東方聖眾。

眾等志心歸命：南方救苦無上慈尊、南方無極世界得道天尊、仙真聖品、無鞅數眾，一切敬禮，徧悉歸依，證明懺悔，卽令亡者，無始以來，受身生身，從劫至劫，三業六根，構造諸罪，殺生偷盜，邪淫放蕩，慳貪恠惜，嗔怒罵詈，愚癡顛倒，綺言妄語，惡口兩舌，飲酒食肉，破齋犯戒，輕師

叛道，訾毀經文，穢汙玄壇，損壞尊像，逆天違地，祝鬼詛神，裸露星辰，吹噓風雨，五逆不孝，萬罪千愆，無量無邊，悉爲除滅。隨願往生，南方淨土，聞經聽法，面對天尊，衣食自然，逍遙快樂，展轉託生，成無上道。稽首歸依，南方聖眾。

眾等志心歸命：西方救苦無上慈尊、西方無極世界得道天尊、仙真聖品、無鞅數眾，一切敬禮，徧悉歸依，證明懺悔，卽令亡者，無始以來，受身生身，從劫至劫，三業六根，構造諸罪，殺生偷盜，邪淫放蕩，慳貪恠惜，嗔怒罵詈，愚癡顛倒，綺言妄語，惡口兩舌，飲酒食肉，破齋犯戒，輕師叛道，訾毀經文，穢汙玄壇，損壞尊像，逆天違地，祝鬼詛神，裸露星辰，吹噓風雨，五逆不孝，萬罪千愆，無量無邊，悉爲除滅。隨願往生，南方淨土，聞經聽法，面對天尊，衣食自然，逍遙快樂，展轉託生，成無上道。稽首歸依，西方聖眾。

眾等志心歸命：北方救苦無上慈尊、北方無極世界得道天尊、仙真聖品、無鞅數眾，一切敬禮，徧悉歸根，證明懺悔，卽令亡者，無始以來，受身生身，從劫至劫，三業六根，構造諸罪，殺生偷盜，放蕩邪淫，慳貪恠惜，嗔怒罵詈，愚癡顛倒，綺言妄語，惡口兩舌，飲酒食肉，破齋犯戒，叛道輕師，訾毀經文，損壞尊像，穢汙玄壇，逆天違地，祝鬼詛神，裸露三光，欺凌四輩，吹噓風雨，不孝五逆，萬罪千愆，無量無邊，悉爲除滅。隨願往生，

北方淨土，聞經聽法，面對天尊，衣食自然，逍遙快樂，展轉託生，成無上道。稽首歸依，北方聖眾。

眾等志心歸命：東北方救苦無上慈尊、東北方無極世界得道天尊、仙真聖品、無鞅數眾，一切敬禮，徧悉歸依，證明懺悔，卽令亡者，無始以來，受身生身，從劫至劫，三業六根，構造諸罪，殺生偷盜，放蕩邪淫，慳貪恡惜，嗔怒罵詈，愚癡顛樹，綺言妄語，惡口兩舌，飲酒食肉，破齋犯戒，叛道輕師，訾毀經文，損壞尊像，穢汙玄壇，逆天違地，祝鬼詛神，裸露三光，欺凌四輩，吹噓風雨，不孝五逆，萬罪千愆，無邊無量，悉爲除滅。隨願往生，東北方淨土，聞經聽法，面對天尊，衣食自然，逍遙快樂，展轉託生，成無上道。稽首歸依，東北方聖眾。

眾等志心歸命：東南方救苦無上慈尊、東南方無極世界得道天尊、仙真聖品、無鞅數眾，一切敬禮，徧悉歸依，證明懺悔，卽令亡者，無始以來，受身生身，從劫至劫，三業六根，構造諸罪，殺生偷盜，放蕩邪淫，慳貪恡惜，嗔怒罵詈，愚癡顛倒，綺言妄語，惡口兩舌，飲酒食肉，破齋犯戒，叛道輕師，訾毀經文，損壞尊像，穢汙玄壇，踐踏靈觀，逆天違地，祝鬼詛神，裸露三光，欺凌四輩，吹噓風雨，不孝五逆，萬罪千愆，無邊無量，悉爲除滅。隨願往生，東南方淨土，聞經聽法，面對天

尊，衣食自然，逍遙快樂，展轉託生，成無上道。
稽首歸依，東南方聖眾。

眾等志心歸命：西南方救苦無上慈尊、西南方無極世界得道天尊、仙真聖品、無鞅數眾，一切敬禮，徧悉歸依，證明懺悔，卽令亡者，無始以來，受身生身，從劫至劫，三業六根，構造諸罪，殺生偷盜，放蕩邪淫，慳貪恠惜，嗔怒罵詈，愚癡顛倒，綺言妄語，惡口兩舌，飲酒食肉，破齋犯戒，叛道輕師，訾毀經文，損壞尊像，踐踏靈觀，穢汙玄壇，祝鬼詛神，逆天違地，欺凌四輩，裸露三光，五逆不孝，吹噓風雨，萬罪千愆，無邊無量，悉爲除滅。隨願往生，西南方淨土，聞經聽法，面對天尊，衣食自然，逍遙快樂，展轉託生，成無上道。
稽首歸依，西南方聖眾。

眾等志心歸命：西北方救苦無上慈尊、西北方無極世界得道天尊、仙真聖品、無鞅數眾，一切敬禮，徧悉歸依，證明懺悔，卽令亡者，無始以來，受身生身，從劫至劫，三業六根，構造諸罪，殺生偷盜，放蕩邪淫，慳貪恠惜，嗔怒罵詈，愚癡顛倒，綺言妄語，惡口兩舌，飲酒食肉，破齋犯戒，叛道輕師，訾毀經文，損壞尊像，踐踏靈觀，穢汙玄壇，祝鬼詛神，逆天違地，欺凌四輩，裸露三光，五逆不孝，吹噓風雨，萬罪千愆，無邊無量，悉爲除滅。隨願往生，西北方淨土，聞經聽法，面對天尊，衣食自然，逍遙快樂，展轉託生，成無上道。

稽首歸依，西北方聖眾。

眾等志心歸命：上方救苦無上慈尊、上方無極世界得道天尊、仙真聖品、無鞅數眾，一切敬禮，徧悉歸依，證明懺悔，卽令亡者，無始以來，受身生身，從劫至劫，三業六根，構造諸罪，殺生偷盜，放蕩邪淫，慳貪恠惜，嗔怒罵詈，愚癡顛倒，綺言妄語，惡口兩舌，飲酒食肉，破齋犯戒，叛道輕師，訾毀經文，損壞尊像，踐踏靈觀，穢汙玄壇，祝鬼詛神，逆天違地，欺凌四輩，裸露三光，五逆不孝，吹噓風雨，萬罪千愆，無邊無量，悉爲除滅。隨願往生，上方淨土，聞經聽法，面對天尊，衣食自然，逍遙快樂，展轉託生，成無上道。稽首歸依，上方聖眾。

眾等志心歸命：下方救苦無上慈尊、下方無極世界得道天尊、仙真聖品、無鞅數眾，一切敬禮，徧悉歸依，證明懺悔，卽令亡者，無始以來，受身生身，從劫至劫，三業六根，構造諸罪，殺生偷盜，放蕩邪淫，慳貪恠惜，嗔怒罵詈，愚癡顛倒，妄言綺語，惡口兩舌，飲酒食肉，啖嚼五辛，犯戒破齋，輕師叛道，損壞尊像，訾毀經文，口是心非，說人長短，嫉妬勝己，陷害賢良，讒擊忠貞，鬥亂家國，違盟犯約，洩漏真科，穢汙玄壇，踐踏靈觀，禱祀神鬼，鼓舞妖言，背正入邪，疑真信俗，祝詛神鬼，厭蠱賢明，逆地違天，訶風叱雨，欺凌四輩，裸露三光，不孝不忠，不仁不義，千愆萬罪，無量

無邊，眼耳鼻舌身意，六根諸罪，悉爲除滅。隨願往生，下方淨土，聞經聽法，面對天尊，衣食自然，逍遙快樂，展轉託生，成無上道。稽首歸依，下方聖眾。

太上道君告南極度命真人曰：元始布化，徧滿十方，五億諸天，三千道境，分身散影，真應化法，緣感立形，說法度人，救濟一切，教化男女，成就眾生。一一境中，皆有帝主天尊，太上老君，真師，玉女玉童，仙真聖品，將軍力士，金剛神王，二萬四千靈司，一百二十曹局，星宮雲殿，水府仙宮，咸有司存，考校罪福，持幢建節，把籙執符，飛空步虛，誦經行道，益善輟惡，却禍消災，晝夜巡行，檢勘得失，俱遵元始，朝會大羅。雖劫運推移，立法無改；十方三界，同一軌儀；三洞分門，隨機所受。首過請福，自下之高。謝罪求恩，由心入道。若違此旨，便從邪法。所以告啓，先詣十方。神運感通，自獲靈應。普告三界，一切男女，宜各用心，依令遵奉。

太上道君曰：人死轉形，各隨先業。或生富貴國王之門，或生端正賢善之家，或生智慧聰明之身，或生具足清淨之身，或生長壽快樂之身，或生貧賤奴婢之身，或生醜陋毒惡之身，或生愚癡濁鈍之身，或生破壞臭穢之身，或生夭折煩惱之身，或生病患苦痛之身，或生邊夷殺害之身，或生六畜猪狗之身，或生鳥獸豺狼之身，或生魚

鼈蟲螳之身，或生鬼神魔邪之身，或處九幽長夜之中，皆由本業所受。過去未來，與今無異。今身所受，從先業來。見(現)世所種，作過去業。世人凡愚，眼觀見世罪福，報應分明，而不信宿命因緣，亦猶食五穀，不知播種所得。罪福之驗，如影響也。勤(當作誠)能懺悔，則罪不生。勤能修善，則福常在。

太上道君曰：人初亡，從一日至百日，安置繪像，請道士行道誦念，晝夜不倦，魂生善處，不墮三塗。若隨初一日，然燈造幡，寫經鑄像，度人各滿百數，亡者即得受生十方淨土，快樂之國，見世福利，無諸災禍。

太上道君曰：送終之時，請道士路左燒香，念誦布施放生，道路靈官，不拘亡魂；飛尸注鬼，不咎生人。若墓左燒香誦經，則土地真官，安穩亡魂，家宅不驚；凶注殺鬼，不干子孫。南極真人，及諸聖眾，同聲稱善，稽首奉行。

《正統道藏·洞玄部·本文類·字上》

太一救苦天尊靈驗記

文銖臺二僧擊救苦天尊像驗

文銖者，長安人也。父母令於別業讀書，爲莊前堆阜之上置書堂焉。而性本疏誕，不樂文字，但與鄰里少年，彈射飛鳥，捕格野獸，以爲戲樂。至於筌笱之具，罽羅之屬、弋網罝畢、弓矢槌刃，靡不置之。數年之間，殺獲不可勝記。忽有道士見之，謂曰：子之頭何遽變也？銖驚而問之，乃引於臺下，令其窺井照之，自見其人形而獸頭矣。欲求道士悔謝，更令熟視井中，頃刻之間，身形不改，而頭已百變，或鳥或獸，或蛇或魚。銖見之，異常憂懼。道士曰：萬物營營，各貪其生。至於飛動，皆重其命。爾反天道而殺之，當有此報耳。每變一頭，則受一生，終爾所殺之數，一一償之，積月累日，計其壽限。自此之後，爾身則死，乃歷生異類之中，報所殺之命，百千萬年，未有還復人身之日。銖號泣求救，願焚弋獵之具，以謝前愆，洗心改悔，不敢更犯。道士見其誠至，乃謂之曰：我奉太上之敕，歷救眾生之苦，名曰救苦真人。爾有昔緣，早合遇道，此若不救，淪陷無期。乃以道士衣與之，令其終身修道，陰功救世，廣濟物命，方免前罪。道士卽躡身而起，去地數

丈，立於金蓮花上，左執瓊琬，右執柳枝，金冠鳳履，身逾三丈，通身有五色之光，上連天表，照曜一川，逡巡乃隱。文銖乃焚羅網之具，披道士天衣，於其處立殿，製所見之像，晝夜精勤，焚香懺罪。居十餘年，又感真仙，授以藥訣，令遊行海內，救人疾苦，後乃得道而去。

其俗所居處，相傳號曰文銖臺，而救苦天尊之像猶在。忽有僧數人遊行，見之曰：既是文銖聖跡，何得有道士功德？固知道士無良，侵我古跡已多年矣。因拔得大木，唯二僧共擊天尊像，手折耳傷，口鼻亦壞，力擊其項，未能致損，用力甚困。二僧少歇，看天尊所傷之處，並已如舊，唯二僧口耳鼻項，痛楚極甚，及看其手，亦已折矣。匍匐號叫，告於眾人，自述其事。良久而死。

音義：筌(quán)，捕魚竹器。筍(gǒu)，竹制的捕魚器，魚籠。罽(wèi)，捕鳥的小網。罽羅，捕鳥的網。弋(yì)，帶絲繩的箭。置(jū)，捕兔網。畢，古時田獵用的長柄網。

張仁表念太一救苦天尊驗

左街道士張仁表，辯博多才。應內殿講論，逗機響答，抗敵折衝，莫能當之也。而所履浮誕，未嘗有由衷之言。及於儕友，險躁詭妄，人多薄之。因疾作逾月，醫不能效，夢爲司命所攝，步卒騎吏，就所居以捕之，亦如世上之擒寇捕姦爾。竄匿無所，縻束將去，歷荒徑曠原，皆荆棘之地，牽頓舁曳，其速如飛。衣掛叢棘，肉碎芒刺，苦不

可堪。行可三十餘里，遙見黑城，上有煙焰，漸近視之，乃鐵城也。擁關衛門，守陴抗敵，皆獸頭人身蛇臂之士。或四口八目，或十臂九頭，齒若霜雪，牙如劍鋒，真世之所畫地獄狀也。入門則珠宮瓊堂，玉樓金殿，非常目所覩，頓異於冥關之中。行四五里，一無所覩，徐問所驅捕者：此何處也？與門外所見不同。或答曰：此太一天尊宮耳，過此方到本司。仁表聞太一之名，忽記得平常講說之處，多勸人念太一救苦天尊；今此乃天尊之宮，何可不念？即高聲念太一救苦天尊十餘聲。牽頓者皆笑曰：臨渴穿井，事同噬臍，胡可得也？既聞眾笑，不阻其念，更唱十餘聲，其調哀楚，其音悲切，亦淚下沾衣。如是忽有赤光，照其左右，牽頓者一時捨去，獨在光明之中。顧盼四方，山川明媚，雲物閒暇。頃之，天尊與侍從千餘人，現其前矣。仁表禮謁悲咽，叩搏稽顙，述平生之過，願乞懺悔。天尊坐五色蓮花之座，垂足二小蓮花中，其下有五色獅子九頭，共捧其座，口吐火焰，繞天尊之身。於火焰中，別有九色神光，周身及頂，光焰鋒鋌外射，如千萬鎗劍之形。覆七寶之蓋，後有騫木寶花，照曜八極。真人力士、金剛神王、玉女玉童，充塞侍衛。陰陽太一四十六神，自領隊從，亦侍左右。雲車羽蓋，徧滿空中。天尊謂仁表曰：人之在生，大愼三業十惡。三業之中，口過尤甚。一人妄說，萬人妄行。

妄說之人，首當其罪。汝之三業，罪無不爲，吾不救護，永淪幽苦。汝壽命已盡，不當復還，今赦汝七年，誘化於世，以吾此像，廣示於人，開引進之門，爲趣善之要，宜勉行之。即使童子引還，疾已瘳矣。數日後，以己之財帛，於肅明觀，畫天尊之像；東洛關外，畿輔之間，傳寫其本，徧令開悟。仁表因出城，於春明門外，見蒿棘之中，如曾行之處，視棘刺之末，有所罥掛衣線紫縷，及棘上微有血痕，果是所追之夕，經行其路。七年而終。

音義：逗機響答，隨機應變。折衝，使敵人的戰車後撤。儕(chái)，類，輩。縻(mí)，牛韁繩。牽頓，牽引。舁(yú)，抬。稽顙(sǎng)，屈膝下拜，以額觸地。瘳(chōu)，病癒。罥(juàn)掛，纏繞懸掛。陴(pí)，城牆。畿(jī)輔，京都附近的地方。

李邵畫太一天尊驗

李邵者，爲葭萌縣令。云其妻亡已八九年，素不在京國。忽因參選入京，稅居於三洞觀側客院之中。偶見其家亡婢，自鄰居而出。熟視之，果其婢小玉也。以名呼之，斂衽而至。問其故，卽云：某隨娘子在此，已歲餘矣。暫出買物，逡巡卽迴，迴卽與報娘子矣。邵待之，食頃方至，買果實茶餅之屬，奔馳還家。良久，延邵相見。所居兩間，自有庭除少許。旣見，敘存沒之事，或泣或悲，而頻令小玉看時節。久之，小玉報云：來矣。顏色慘悴，語聲哽咽，揖邵請去。邵未出門，有一少年，張蓋而入，邵忽遽避之，小玉卽引於

簾後且立。其妻出迎少年，拜亦不顧，擲蓋於地，化爲大鑊，水滿火起，煙焰蓬勃，少時卽沸。少年去大帽，卽牛頭神人也。持叉立於鑊前，以叉叉其妻，拋於鑊中，號叫痛楚，不久卽爛，骨肉分張，尋亦火滅。以叉挑其骨，排於庭中，張蓋而去。其妻身亦復舊，蘇而徐起，泣謂邵曰：平生罪業，合受三年，今已一年餘矣。每日如此，痛苦難言。

邵見其變化苦楚，亦深悲嘆，問妻曰：今旣相見，所須何物？莫要作功德救拔否？妻曰：適令小玉相邀，全爲功德相託爾。此處鄰里，有受苦者，畫太一天尊一身，便得免罪。知之數月，無託人處。今得君來，將有離苦之望矣。邵卽於三洞觀中，訪太一天尊之像，殿上卽有，古本剝落。厚以金帛，召良工畫之，亦就觀設齋表祝。只三日內，事事周畢，躬自檢校，無暇到妻所居。功德旣了，方得往報。見其所止，已空屋爾。留託鄰母，深荷太一功德，已得解脫往生矣。昨日辰巳間，與小玉俱去也。邵每勸人作太一天尊像，其福報可以立待矣。

音義：葭(jiā)。斂衽(rèn)，整飭衣襟，表示恭敬。

李昌遐誦《消災經》驗

李昌遐者，後漢兗州刺史之後也。生而奉道，常誦《太上靈寶昇玄消災護命經》。而稟性柔弱，每爲眾流之所侵虐。忽因晝寢，夢坐煙霞之境，

四顧而望，熊羆虎豹，圍繞周匝，莫知所措，不覺傷嘆：何警戒之甚邪！謂積善之無驗。於時空中有一道士，呼其名而語之曰：吾卽救苦真人也，汝勿驚駭。吾奉太上符命，與諸神將密衛於汝。且汝常念者經云：流通讀誦，則有飛天神王、破邪金剛、護法靈童、救苦真人、金精猛獸，各百億萬眾，俱侍衛是經。昌遐既覺，豁然大悟，因知自前侵虐我者，未有無禍患殃咎，蓋誦經之所驗也。

音義：兗(yǎn)。羆(pí)。

《正統道藏·太玄部·雲笈七籤·道教靈驗記·棠中》

《正統道藏·洞玄部·記傳類·道藏靈驗記·常上下》

願消三障諸煩惱，願得智慧心明了。
普願災障悉消除，世世常行無上道。
四恩三宥均利益，十洲三島任逍遙。
回向四府眾龍神，禮謝道經師三寶。
圓滿功德福無邊，風調雨順民安樂。

原以此功德，普及於一切。
誦經保平安，消災增福壽。

本書版權不保留

翻印流通積功德